

## Off em Daanzboode

Beim Kaufmoo, doa well schnell die Maari noch käff  
a billigs Parfümm un a deuera Säff.

Die Kattrin, die künnt aus em Owerdurf roo:

"Boos ziehst du denn für a Daanzklädla oo?

Höit oweds künnt extra zum Wiarßssool zum Daanz  
vo Pöpplaroht rü dei Liebling, dr Fraanz." -

- "Dei Hänsla werd, män ich, doch aach bei uns sei.  
Doos kann doch, benn Daanz is, dahämm niat geblei."

Im Dörfla gäats eilig un wichtig höit zu,  
kä Mönch is jetzt müßig, kä Mönch hot sei Ruh.  
Die Mannsleut, die dünn sich die Böart oorasier,  
die Weibsleut mit Forwa die Gsichter eischmier.  
Dr Vinz wöscht die Füaß, die schwoarza, sogar,  
dr Kunner, der schmiert sich Pomade neis Hoar.  
Dos Fritzla hämlich dorchs Schlösselloch spitzt,  
weil dinn die Fränz in dr Boodwanna sitzt.

Doch oweds gäat richtig die Gaudi erscht oo,  
beim Daanz fahlt kä Fraa, doa fahlt aach kä Moo.  
Es Jungvolk sitzt doa, schua lang vor da Zeit  
auf Bänk dinn im Sool an de Wänd aufgereiht.

Mit Rumsdadabumm un Humsdadabamm,  
trärä, didelid un dimdadadam  
die Musik spielt endlich, o gädich, o jeh!  
Doos rührt dinn im Bluet, doos föahrt nei die Bä.

Dr Fraanz packt die Kattrin un wirbelt se römm,  
reißt beinoah dem Michel sei Thekla mit ömm.  
Doch dr Michel hot feest die Korsettstäb gepackt,  
sei Thekla is dick, künnt leicht aus en Takt.  
Dr Lubba bleckt kräftig: Diriedulidä  
un schläfft weit römm sei klapprig Gebä.

In da Pausa läffts Bier durch die Kehlschläuch in Massa,  
ma mänt fast, die Bäuch, die könntes niat fassa.  
Boos flüssig is, werd scho bal außig geschwietzt,  
dr Alkohol feest in da Klöasköopf dinn sietzt.  
Die Börschlich sen roat bie an Affapopo,  
die Mädlich sen lustig un strahla nur so. ---